



Synfocity = 478

mail us at : mzsynfo@gmail.com; mizoramsynod@gmail.com - Phone - 2314648

13th March, 2014

☐ Kohhran Hmeichhe Rorel Inkhawm vawi 7-na a tiak ta

March 7- 9 chhung khan Durtlang Presbyterian Kohhran Biak Inah Mizoram Presbyterian Kohhran Hmeichhe Rorel Inkhawm vawi 7-na tluang taka neih a ni a, thupuih 'Lalpa lam i hawi ang u' (Tah Hla 3:40) tih an hmang. Rorel Inkhawmah hian Dr. Lalngakthuami, Associate Professor, ATC; Pi Rosangpuii, Central Committee Member leh Rev. Lalramliana Pachua, Executive Secretary i/c Women ten thupui hmangin Pathian thuchah an sawi thin bawk.

January - December 2013 reports :

Kum 2013-ah Mizoram chhung leh pawn ami, Mizoram Synod hnuai awm Kristian Chhungkaw dinhmun tehnaa tel Bial 177 an awm a, report bial 1 a lut lova. Bial 176 atanga Report khaikhawm hetiang a ni :

- | | |
|----------------------------------------------|--------------------------------------------------------|
| 1. Report lut zat : 176 | 7. Nitin chhung inkhawm nei zat : 60,179 = 58.85% |
| 2. Kohhran zat : 803 | 8. Buhfai tham ziah zat : 99,727 = 97.52% |
| 3. Branch Church zat : 70 | 9. Hmeichhe member zat : 1,61,449 |
| Total : 873 | 10. Member tam ber Bial : Chanmari Bial (Member 3,512) |
| 4. Presbyterian hlang chhungkaw zat : 97,672 | 11. Member tlem ber Bial : Buarpu Bial (Member 56) |
| 5. Inawm pawlh chhungkaw zat : 4,588 | 12. Hmeichhe inkhawm nei thei vek Bial : 142 |
| 6. Chhungkua zawng zawng zat : 1,02,260 | |

Kum 2013 hian ni tin chhung inkhawmah kum hmasa aiin 1.68%-in an pung a, Buhfaithamah 0.49% in an pung a, nikum (2013) aiin Zaa za tham hi Bial 19 -in an pung bawk. Kristian Chhungkaw dinhmun tehnaah N.E. Khawdungsei Bial an sang ber a ni.

Thurel tlangpuite :

Rorel Inkhawmah hian palai 401 (Palai = 347, Central Commt. Member = 39, Synod Puipate = 1, Central KTP Palai = 2, ATTWI member te = 6, Pastor = 3, Invitee = 2 & Chhimtu = 1) an kal a ni.

- 1) Kum 2015 Kohhran Hmeichhe Khawmpui Lian chu March 6 - 8, 2015 chhungin Mamit-ah ngah a ni ang a, Mamit leh Mamit Hmunsam Bial ten an thleng dawn a ni.
- 2) Kum 2014-15 Budget/Project atan hetiang hian pawn a ni

Women Centre	: Rs. 50,00,000.00
Central Budget (WC Special)	: Rs. 15,00,000.00
Total	: Rs. 65,00,000.00
- 3) 'Hmeichhiate zalenna zau zawk kan neih hi hmang thiam a, Kristian hmeichhe dik tak kan nih zel theih nan inzirtirna neih ni rawh se' tih chu tha tih niin Central Committee-in a bawhzui tura dah a ni.
- 4) 'Ram pum huapa Nu mawhphurhna inzirtir ni se' tih chu pawn niin Central Committee-in ruahmanna a siam ang.
- 5) Tleirawlte inthuang dan mawi inzirtir kawngah chak taka hma lak tura rawtna chu pawn niin Central Committee in a bawhzui ang.
- 6) Synod Hospital Charity Fund atan ram pum huapin Thawhlehi zan Inkhawm thawhlawm lakkhawm leh ni rawh se, tih chu tum 2 lakkhawm turin pawn a ni
- 7) Tu leh fate a tam thei ang ber Pathian biak Inkhawma hruai thin tura tan lak rawtna chu rawtna angin tihlawhtlin tha tih a ni a, Central Committee in hma a la ang.

☐ Chanchin Tha Thlen Ni

Mizorama Chanchin Tha Thlen Ni programme hi January 11-ah kan hmang thin a, kumin atang erawh chuan March 15-ah kan hmang thin tawh dawn a ni. Hetianga kan rama Chanchin Tha lo thlen Ni kan hman thin hun insawn ta hi tlema sawi chian deuh a tha ang e. Thil awm dan tlangpui chu hetiang hi a ni -

Kum 1940 chhovah khan Mizorama Chanchin Tha thlen champhaphak lawm an duh avangin Mizoram Presbyterian Kohhran leh Mizoram Baptist Kohhran khan lawm hun tur sawiin an inhmua khawm a. Kohhran pakhat ang maia an awm lai, hmar kohhran leh chhim kohhran tia an sawi mai thin hun lai kha a ni. Chanchin Tha thlen ni chungchangah hian ngaih dan pahnih a awm a. Hmar lam kohhran chuan Mizorama missionary lo kal hmasa ber leh Lal Isua Chanchin Tha rawn sawi hmasa bertu, Welsh missionary Khasi rama thawk, Rev. William Williams-a'n Mizoram a rawn tlawh kum, kum 1891 kha pawn tur niin an hria a. Chhim lam kohhran erawh chuan London-a mi hausa Robert Arthington-a'n Mizorama thawk tura a rawn tirh, Rev. J.H. Lorrain (Pu Buanga) leh Rev. F.W. Savidge (Sap Upa)-ten Mizoram an rawn thlen ni, January 11, 1894 chu pawn tur niin an hre thung a. Tichuan, lunguala Chanchin Tha Thlen Ni lawm an duh si avangin, chhim lam kohhran duh dan chu pawmpuiin, kum 1944 January 11-ah kan rama Chanchin Tha thlen Golden Jubilee chu an lawm ta a ni.

Hun lo kal zelah kan Synod inkhawmpui 1974 chuan kum tin January 11 chu Chanchin Tha thlen ni-a hman a rel a, tichuan, kum tin kohhran inkhawm programme siamin nikum 2013 thleng khan kan hmang chho ta a ni. Amaherawhchu, kum 2012 Synod Inkhawmpui, Aizawl Chanmari Kohhrana awm chuan, Serlui Presbytery atanga thu lut, Mizorama Chanchin Tha Thlen Ni atana March 15, 1891 pawn tura rawtna chu a pawn a. Chuvangin, kumin 2014 atang hian Mizorama Chanchin Tha Thlen Ni atan March 15 kan hmang tawh dawn a ni.

March 15 Chanchin Tha Thlen Nia kan hman chhoh tur thu-ah hian, kan Synod Inkhawmpui 2009 Mission Vêngthlang Kohhrana awm chuan, ngun taka thil a zir chian hnuah hetiang hian thutlukna siamin a lo pawn tawh a ni (2009 Synod bu p. 171). "Rev. William Williams chuan March 15, 1891 (Pathianni)-ah Kutbûl lui kaiah Mizote hnenah Pathian thu a hrilh a, March 16-ah Changsil an thleng a, ni hnih an cham a, kein Sairang an pan a, March 20, 1891-ah Sakawr chungah chuvingin Aizawl an lut."

Kuminah hian Chawhma & Zan Inkhawm programme siam a ni a, thupui atan chawhma inkhawmah "Tih makmawh - Chanchin Tha hril" (Eze 33:7-11; 1 Kor 9:16-18) leh zan inkhawmah "Chanchin Tha avangin engkim ka ti ang" (1 Kor 9:19-23; 2 Kor 6:3-10) tih hman a ni.

☐ Rev. William Williams-a hriatrengna (monument) hawng dawn

March 15, 2014 (Inrinni) chawhma dar 11:30 hian Serlui Presbytery chuan Rev. William Williams-an March 15, 1891-a Mizote hnenah Lal Isua Chanchin Tha a hrilna hmasaber hmun hriatrengna (monument) hawnna, Kawnpui ram Kutbul lui chhuah, Tlawng lui kamah an buatsaih dawn a, programme hi Serlui Presbytery Moderator Upa H.F. Senan a kaihruai ang a, Rev. Lalzuithanga, Senior Executive Secretary-in Monument a hawng ang a, thuchah a sawi bawk ang. Upa Lalropuia hnen atangin Technical Report ngaihthlak a ni ang a, Kawnpui Chhim Veng Bial Zaipawl leh Mizoram Synod Choir-ten hla an rem ang. A duh apiang thusawina hun hawn a ni ang a, Upa R. Lalramhluna, Serlui Presbytery Secretary (Sr.) in lawmthu sawina hun a hmang ang a, Rev. Sikulfala, Kolasib Venglaiin Malsawmnain a tin ang.

Contd...

☐ **Obituary : Rev. Rohnuna (69)**

Rev. Rohnuna kum 69 (Pensioner), Tlangnuam chu Mar. 8, 2014) zing dar 4:45 khan Stroke avangin a thi a, chhun dar 12:00-ah In lamah thlahna hun hman a ni a, chawhnu dar 1:00-ah Tlangnuam Kohhran Biak In-ah Rev. K. Lalhmuchhuaka, Synod Moderator-in a vui a ni. Upa H. Zoliana, Synod Secretary(Sr) hnen atangin A chanchin tawi ngaihthlak a ni a, Tlangnuam Bial Zaipawl an zai a, Rev. K. Lalhmuchhuaka, Synod Moderator in thlamuanna thuchah a sawi a, Upa Vanengliana, Synod Statistician-in tawngtaina hun a hmang.

Rev. Rohnuna hi Pu Chawihuama(L) leh Pi Chhingi(L) te fa pariat zinga parukna niin, April 19, 1945-ah Saitual-ah a lo piang a, May 29, 1978-ah Pu Rokhuma Sailo, Dawrpui fanu Lalzikpuii Sailo nen inneini fapa 2 leh fanu 1 an nei a ni. Zirma lamah HSLC(March 1970), B.Th.(ATC-1976) a ni a, January 7, 1977-ah Hnahlan Biala Aiduzawl khuaah Pro. Pastor hna a thawk tan a. Kum 1980-ah Dawrpui Biak Ina Synod Inkhawmpui chuan Pastor atan a nemnghet a ni.

Kum 1981-1990 chhung Kawrthah Bialah a awm a, 1991-1992 chhung Synod Rescue Home-ah Director hna a chelh leh a, 1993-1999 chhung Tlungvel Bialah a awm leh a, kum 2000-2005 chhung Kulikawn Bialah a awm a. A rawngbawl chhung hi kum 29 a ni. Kum 2006 January thla aangin pension-in a chhuak a, Aizawl Tlangnuam-ah an khawsa zui ta a ni. A Pension hnu hian zunthlum natnain a tibuai zual a. Damdawi In leh In lamah te pawh theih tawp chhuahin enkawl hin a ni a. CMC & Hospital, Vellore-ah pawh um hnih lai chu kalpui a ni a. In lam leh Damdawi In lamah te enkawl a ni chungin that lam a pan tak tak thei chuang lo va, March 8, 2014 (Inrinni) zing lam dar 4:45 khan rinawm taka a rawng a lo bawl hin, a Lalpa hnenah thlamuang takin a chawlh ta a ni.

☐ **MSSU**

♦ March 14 (Zirtawpni) zan hian Tuikhuahtlang Kohhranah Naupang Sunday School Zirtirtu Training neih a ni dawn a, training neihpui tur hian Pu John Lalhruiatluanga, MSSU Asst. Coordinator leh Upa B. Lalhmunliana, Bethlehem Venglai (MSSU Trainer) te an kal ang.

♦ March 15 (Inrinni) hian Bawngkawn Hmar Veng Kohhranah Sunday School Zirtirtu Training neih a ni dawn a, training neihpui tur hian T.Upa Lalthahluna Ralte, MSSU Asst. Coordinator leh Upa Hrilthansanga, Mission Vengthlang (MSSU Trainer) te an kal ang. Zan Pathian biak inkhawmah T.Upa Lalthahluna Ralte-in Fanau enkawl (Child Evangelism) chungchang thuchah a sawi ang.

☐ **Campus Ministry**

March 7, 2014 khan Campus Ministry hmalaknain Synod Committee Room No. 1-ah Mizo & English Medium School (Class I - XII) zirilaibu zirchianna neih a ni. He zirchiannaah hian zirilaibu-ah Moral Education lam leh Pathian thu lam inzirtirna awm dan chungchang zirna a ni ber. College, University leh Aizawl Theological College lama Lecturer mi 24 ten chanvo insemin an zir chiang mek a, rawtna mumal nen May thla lamah inhmukhawm leh a ni ang.

☐ **Music**

March 17 (Thawhtanni) chawhma dar 10:00 atangin Mission Veng Kohhran Hall-ah Lengkhawm zai hruaitu training neih a ni dawn a, hetah hian Aizawl khawpui chhung Kohhran tin atangin khuangpu 2 theuh tel tura sawm an ni. Training hi Session 2-ah then a ni a, chawhma lamah Rev. K. Lalthanliana paper 'Kohhrana lengkhawm zai pawimawhna' tih zirho a ni ang a, chawhnu lamah Pu Lalromawia paper 'Lengkhawm zai khuangvuak dan' tih zirho a ni ang. Sawihona leh practical neih a ni bawkw ang.

☐ **Kristian Thalai Pawl**

♦ North Lungpher Branch Diamond Jubilee (March 13-14) hmanpuiin Dr. Lalliansanga, CKTP Asst. Secretary thar a kal.

♦ CKTP hruaitu hlui leh a thar ten March 20, 2014 (Ningani), 4:00 pm hian charge an inhlan ang. KTP Conference 2014/ Diamond Jubilee lawmna an thlirlet ang a, hruaitu thar ten meeting an nei zui nghal ang.

♦ March 15 (Inrinni) hian Serlui Presbytery ten Rev. William Williams-an Mizote hnena Chanchin Tha a hrilna hmasa ber hriatrengna an siam Monument hawwna (Kutbul lui chhuah, Tlawng kam)-ah Mizoram Synod Choir te an zai ang.

♦ Mizoram Synod Choir Music Video Album thar "Aw Isu, min kai ang che" tih chu CKTP Office-ah lei theihin a awm, Rs. 160/- man a ni. A tha lo lei palhte tan thleng theih a ni bawkw.

☐ **SMTC Retreat**

March 10 - 12 chhung khan Spiritual Retreat, Synod Multipurpose Training Centre (SMTC), Mission Vengthlangah neih a ni a, Speaker atan Pu Lalremruata, Beiseina Nung (Living Hope) Ministry an ruai a, Staff leh zirlaiten an hlawkpui hle.

☐ **Hruaina Eng FM Radio & TV Programme**

♦ **MARCH 14 (FM Zoawi Aizawl @ 7:30 p.m.) :**

Zaipawl : East Phaileng Pastor Bial Zaipawl - Jerusalem Pindan Chungnung, **Solo :** C. Lallianpui - ka nun hnar kai tu, **Thuchah :** Rev. Lalchhuanmawia - Chanchin Tha hril - Kohhran hnapui, **Solo :** Mafeli - Siamtu remruat, **Zaipawl :** Mizo Cardinal Choir - Lawmthu kan hrilh che

♦ **MARCH 14 (FM Lunglei @ 7:30 p.m.) :**

Zaipawl : East Phaileng Pastor Bial Zaipawl - Jerusalem Pindan Chungnung, **Synod News, Solo :** C. Lallianpui - ka nun hnar kai tu, **Thuchah :** Rev. Lalchhuanmawia - Chanchin Tha hril - Kohhran hnapui, **Solo :** Mafeli - Siamtu remruat, **Zaipawl :** Mizo Cardinal Choir - Lawmthu kan hrilh che

♦ **MARCH 16 (TV Programme @ 3:00 p.m.) :**

KTP General Conference 2014 : Multiplex Programme - Zu leh Ruihhlo chungchang, **KTP General Conference 2014 Programme Lawrkhawm**

☐ **Susamachar Prasaran Programme**

MARCH 16 (Pathianni) 5:00 pm. Hindi Gospel Programme (Susamachar Prasaran) :

Group/Choir/Solo : Luangmual Vengthlang - Bondhu re, **Group/Choir/Solo :** Jubilee Kohhran - Yeshu Ne, **Sermon :** Rev. P.C. Rohlira - Isu masi papyangko pyar kanewala, **Group/Choir/Solo :** Khatla Masihi Sangati - Ishu Tera Wada, **Group/Choir/Solo :** Melthum Masihi Sangati - Krista Zara Unau

☐ **Synod Hotute Programme**

♦ KJP Synod Mihngi, Mynso, Meghalaya-ah Mizoram Synod aiawha palai turin Rev. K. Lalhmuchhuaka, Synod Moderator leh Upa Zoliana Royte, Khatla te March 12 (Nilaini) khan an kal a, March 17 (Thawhtanni) ah an lo let leh ang.

♦ March 15 (Inrinni) hian Rev. William Williams-an March 15, 1891-a Mizote hnena Chanchin Tha a hrilna hmasaber hmun hriatrengna (monument) hawwna, Kawnpui ram Kutbul lui chhuah, Tlawng lui kamah Serlui Presbytery ten an buatsaih dawn a, monument hi Rev. Lalzuithanga, Senior Executive Secretary-in a hawng ang a, thuchah a sawi ang.

♦ March 4 - 14 chhung hian Mission Field hrang hrang - Jharkhand, Patna, Lucknow leh Delhi Field Committee a tel turin Rev. P.C. Pachhunga, Executive Secretary; Rev. Labiakvulmawia leh Rev. C. Lalsangliana (BEC Members) te an kal.

♦ March 11 - 14 chhung hian Rev. Lalramliana Pachuau, Executive Secretary i/c Theological Education chu Master's College of Theology, Vishakapatnam-ah pastor Retreat-a Speaker tur leh Graduation Day-a Chief Guest tura an sawm anging a kal a. March 15 & 16 hian Ri Bhoi Synod, Umlaper, Meghalaya-ah a hmang nghal bawkw ang.